

## 14 JULIE 1904

**H**IERDIE maand is dit 50 jaar gelede dat Stephanus Johannes Paulus Kruger, Staatspresident van die Suid-Afrikaanse Republiek te Clarens oorlede is.

Tans is die huis in Switserland waar ons vaderlandsliewende President en Pretoria se beroemdste burger sy laaste maande deurgebring het, die eiendom van die volk van Suid-Afrika.

In sy gewese hoofstad beywer genootskappe en owerhede hulself om president Kruger se nagedagtenis te eer. Oor 'n paar maande sal die Krugerstandbeeld na 'n vertraging van byna 60 jaar uiteindelik op die Kerkplein van Pretoria te staan kom.

Ons genootskap het die Administrateur van Transvaal ook gevra om die ou Republikeinse wapen voor 10 Oktober weer op die gewel van die Goewermentsgebou aan te bring. Reeds is deur die Provinsiale Administrasie van Transvaal aangekondig dat die ou wapen van die Z.A. Republiek buite en binne die Raadzaal in ere herstel sal word.

Maar ons Genootskap verwag ook dat die Kerkplein 'n meer Afrikaanse voorkoms sal kry. Om hierdie rede herhaal die Genootskap Oud-Pretoria sy versoek van Desember 1951 naamlik dat daar op aangedring word dat inheemse boomsoorte die plein moet versier, bv., witsinkhout- en geelhoutbome vir skaduwee en kaffer-, wildepeer en akasiabome vir blom- en kleureffek. Meer vyvers en fonteine behoort aangelê te word, terwyl die busvervoer en waghuisies van die plein verwyder moet word.

Ons doen 'n beroep op ons burgemeester, raadslid dr. H. Muller om die Genootskap se versoek in verband met die Kerkplein daadwerklik te steun, sodat Pretoria voor 1955 'n eg Afrikaanse plein sal besit waarvan die Krugerstandbeeld die middepunt sal vorm.

Die Stadsraad en Oud-Pretoria moet in die bewaring van ons stad se geskiedenis ten nouste saamwerk. Hierdie belangrike samewerking word 'n dringende vereiste noudat die eeufesreëlings vir Pretoria getref word.

Al die lede van die Genootskap Oud-Pretoria stel opreg belang in die geskiedenis en vooruitgang van ons stad. Hierdie belangstelling is vanjaar sterker as ooit sodat die onderstaande woorde uit President Kruger se laaste boodskap van 1904, vandag by ons selfs 'n dieper inklank as voorheen vind:

„Zoekt in het verleden al het goede en schoone.”

W. PUNT,  
Voorsitter.